

Claudius Philips a logra triunfo den Corte pa limpia su nomber

Claudius Philips a bay Corte contra Daury Rodriguez kende a yame Pedofiel. A causa di e insinuacion aki, varios presentacion di dje a wordo cancela. Daury no por a proba loke el a insinua y awo mester rectifica.

Pa loke ta e caso aki, dia 21 di juni a sali un publicacion cu ta bay honra musiconan di San Nicolas. Un di nan ta Claudius Philips. Daury Rodriguez a comparti e posgt aki y a agrega: "But Pedophiles Get Honored" y "Pedophile Paradise". Abogado di Philips a bisa Rodriguez den un carta cu tabata hopi cla cu den su publicacion e tabata referi na e artista y ta insinua cu e ta un pedofiel. Esaki e lo a bisa relaciona cu e condena di 2011. Y a splik'e cu e condena ey no tin di haber cu pedofilia. A pidie pa no haci e publicacion y pone un rectificacion. Sinembargo Rodriguez a nenga. Solamente el a pone e carta di abogado y a skirbi "See you in court Claudius Philips."

A causa di e publicacion, diferente presentacion di e artista a wordo cancela.

A splica cu loke Philips ta pidi ta forma un limitacion riba e derecho constitucional di libertad di expresion cu cada ciudadano tin. Esaki basta cu cada persona tuma su responsabilidad pa su expresion y por wordo limita solamente via di ley. Por ehempel pa proteccion di e bon nomber of derecho di otronan. Pues mester limita e derecho di expresion si e post ta inhusto pa cu e artista. Tin dos cos pa pone den balans: e derecho di Philips pa su integridad personal y nomber no wordo daña door di expresion di Rodriguez. Di otro banda, e derecho di Rodriguez pa expresa su mes den forma critico publicamente den forma informativo, dunando opinion of den forma di advertencia riba un persona pa señala situacionnan incorrecto, entre otro abuso sexual di un mucha of muchanan.

Libertad di expresion no ta encera solamente contenido di opinion, pero tambe e forma den cual ta expresa esaki. Pero tambe si e ta ofensivo, impactante y preocupante.

Na Aruba en general, ta para den e veredicto, pedofiel ta para pa abuso sexual di muchanan. Un cos cu si e finalisa den condena ta bay man den man cu indignacion social y desprecio pa cu e perpetrador.

Ora cu Rodriguez a share e post di reconocimiento y a agrega "But Pedophiles Get Honored" y "Pedophile Paradise", na opinion di Corte, el a señala Philips publicamente como un pedofiel, of



un persona cu ta abusa sexualmente di muchanan, mientras cu, segun Philips, no por papia di esaki. Esaki ta un cos cu Corte a evalua caba den un sentencia di 19 di augustus, 2002.

E forma con Rodriguez publicamente a señala Philips como un pedofiel, a afecta e ambiente personal di Philips den forma negativo. Pa desvia di e pensamiento aki, Rodriguez mester a motiva esaki suficientemente. Pero Corte ta bisa cu e solo hecho cu a haya pornografia infantil den su laptop no ta suficiente pa señal'e como un pedofiel. Y e video cu el a presenta despues cu el a haya di un persona anonimo, no ta suficiente prueba tampoco.

Den un bodemprocedure e splicacion di Rodriguez no ta suficiente y su expresion lo wordo considera como uno inhusto, cu ta daña e honor y bon niomber di e artista. Esey ta nifica cu el a causa daño na dje. Corte no ta mira cu tin circunstancia cu por haci cu e interes di Rodriguez ta pisa mas cu esun di Philips. Corte ta ordena Rodriguez pa den 24 ora di tempo elimina e post for di Facebook y want'e for di Facebook. Tambe a ordene prome cu 24 ora transcuri pone siguiente rectificacion, sin ningun comentario of reacciobn, riba Facebook di Rodriguez y want'e eyriba pa minimo 2 siman.